

四庫全書

集部

欽定四庫全書

集部
道鄉集卷十四至
六

詳校官庶吉士臣吳烜

侍讀臣孫球覆勘

總校官中書臣朱鈐

校對官典簿臣劉景岳

謄錄監生臣林大本

謄錄監生臣費元震

欽定四庫全書

道鄉集卷十四

宋 鄒浩 撰

詩

寄巡鋪溫昭侍禁為杲之弟也

幾日長亭復短亭
霜梅夾路喜相迎
風光總屬君家管
霽色偏隨馬足生
老酒盈杯誰款曲
少陵佳句謾分明
回頭安福前山曉
入柱簷簷無限情

山行示同遊

碧雲堆裏共徜徉
莫厭捫天帶夕陽
遊徧桂州巖穴後
更無閒夢到南方

東山

我是來仙閣上仙
天教飛鶴過山顛
松篁為我生清韻
一似薰風初入絃

又

七星峯頂絕纖埃
不負烟霞雙眼開
昨日湘南遙指處
飛騰今向此中來

寄題妙峯閣慧照堂

威藏主授業院有閣有堂求予名既名之而示此偈

妙峯閣外雲收翳慧照堂中日放光大地山河都見了

此心聊寄一鑪香

葉筠元禮留飲

天造移居漢水湄嶺邊欣與故人期紅燈暖照金波動
全勝來仙閣上時

其二

殷勤留我共清樽無限情懷子細論天色亦如人意好

晚來星斗滿前軒

寓壽寧方丈州人求識面繼來焚香作禮獻呈

曉老

維摩丈室一張床暫寄清宵夢幾場却被閒人作禪看
競來合掌要焚香

戲靈川令王洵仁仲

長官貪着祖師禪有甚心情問我船一隻逃歸兩隻破
謾凭江檻望靈川

示仁仲

槎頭一別十經年
月照黃茅夢不圓
今日北歸恩賜與
相逢如在四禪天

其二

一根燒筍共分甘
髣髴當年漢水南
紅柿鳥殘無此意
前三三與後三三

次韻和仁仲滑石鋪泉軒

長官心事古人前
碧玉峯巒碧玉泉
洗出北歸烟瘴眼

光明欣覩太平年

假寐靈川報恩寺

故人猶在驛亭邊
暫向雲房借榻眠
漏泄祖師多少意
松聲都到小牕前

示春陵顧林宗

寇公樓下釣魚船
橫絕晴波已七年
邂逅蓮宮論往事
恍疑同在夜摩天

見魯直題陶商翁碑後有感

碑在興安
石灰鋪

石上猶新墨忘情亦嘆嗟殊恩但歸骨冷迹尚平沙願
力消塵垢瞻依盛寶花人間幾行淚空洒玉川家

入湖南界

踏着湖南境界新展開天宇淨無塵增添喜色知多少
滿眼雪峯如故人

北風吹滿亂山雲山頂皚皚色尚新恠得幾朝寒暝日
元來留雪迓歸輪

一自瀟湘見雪飛炎氛遮眼暗漁磯今朝纔入湖南界

便覩玉光生翠微

北風吹面過如冰也勝南風瘴水濱
莫向知亭嫌太冷
主人元是鐵心人

薄薄陰雲淡淡天
北風迎路徹重綿
從教捲起轎簾子
吹盡幾年嵐瘴烟

重重疊疊擁遙峯
總在輕烟薄霧中
疑是李成初畫了
生綃千幅掛晴空

淡描深拂百千般
終日擡頭不厭觀
造物始初誰與樣

定應曾得古圖看

一等乾坤一等山
纔分湖嶺便多般
何如洗盡昏昏瘴
都作晴天萬仞寒

折得梅枝挿轎簾
路人驚怪簇巉巖
從教大擔擔將去
深入三家村裏談

短簫長笛鼓鼙鼙
簇紙為船棹晚風
送了鬼神無一事
大家贏得醉顏紅

雞未鳴時整客衣
行行只恐日斜暉
米塘過了全州近

恰遇村人趁市歸

赤脚蠻中新出來
湖南逢着盡銀釵
雖然未得凌波樣
已會人人着草鞋

示崇寧長老允和

和無一手

安心得髓遇昇平
不似雲門不解行
聊與祖師分半座
湘山頂上放光明

示澄庵庵主炳著

又向全州現此身
澄庵猶是舊時人
相逢休話從前事

且點茶來吃一巡

澄來澄去不知年一片澄光月樣圓
照破十方三世黑
大家同集世尊前

不肯南來伴我閒若來何法可心安
直饒參得齡鐵背
也被昭州烟瘴漫

示張道人

幾年龍虎自相隨南斗延生恩賜歸
霄漢路通鸞鶴在
不妨高躡紫雲飛

妙高亭

四望山長老文照即山頂造一亭求名以妙高名之而示此句

四望山頭老比丘笑他思大浪經由巧將三十三天好
都向青雲青處收金翅遠投雲際歇銀河低遶砌邊流
高高更有堪行路騎取瀉山水牯牛

六一巖

余與子初同邵武李師聯祖道姑蘇徐武靖國零陵蔣滄彥同長老永明由澹

岩穿後岡攀援藤蘿窮覽勝事樵不到處得此岩穴遂以六人一時同見名之而以六人一時同見分韻有作乃若年窮氣象妙與人會則惟出此岩而外矚與入澹岩而內盼者心自喻焉不可以言罄也得同
字崇寧四年十二月十九日

造物有所待，巉巖從此通。
千峯豁前障，萬象欵來同。
滌覽進江水，嘯晴生虎風。
誰知不朽事，成在笑談中。

喜長老永文方自外歸

荆棘叢中自在人，不知何處是埃塵。
巖前逢着笑絕倒，也似炎荒金色身。

文長老云：山有訓狐鳴，即客至；夜來鳴，更異常。
我入山來亦偶然，初無消息與人傳。
訓狐緣底潛知得，隔夜飛鳴報老禪。

自淡山過暗巖

淡中有味味真味暗裏有明明更明不是同來三大士
有誰能識此時情

觀真珠花留戲陳瑩中

古觀無人花自開真珠顆顆映莓苔留教合浦居士看
何似海邊新蚌胎

示法輪長老景齊

問碑碑已化為塵却得同生庚子人聊把此心論此事

頗疑前日是前身雲間岫巖峯回禮庭下娑羅花獻春
更欲縱橫見端的夜來飛雨洗金輪

示雲谿長老文慶

與師應有緣相見便欣然徑出牧牛室共捫垂雨天一
真誰境界萬物自山川放手無餘事歸來汨碯眠

示方廣長老從譽

五百阿師何處來天堂初不隔天台靈泉飛作人間雨
法鼓騰為山下雷對現此身誰髣髴上方重閣正崔嵬

只應永刳觀空眼總向峯前歡喜開

題譽老無住閣

不二門開刹海中十方世界本來同
四威儀竟無所著千手眼應如是通
彌勒當年曾示現善才於此悉參同
而今我亦逢師處聊擊欄杆問祖風

自方廣冒雨過高臺示德瀾長老

雲烟猶暝曉杖屨已高臺眼向不危去
景從無外來巧將新水墨洒出舊塵埃
携得還天北晴時濶展開

定林長老首座自合浦來以此示之

已入高樓見彌勒却尋舊路禮文殊誰知垢膩衲衣內
總是摩尼無價珠

示萬壽長老道琮

萬壽閣中逢故人萬年松下偶穿雲憑將五分真香爇
長對南山祝聖君

示衡嶽寺善果庵道成庵主

遊了諸山問了禪却來庵裏坐安然何如一瓣焚香去

飛作祥雲徧九天

示勝業寺長老有餘

韶陽一曲有誰知
拍手相逢笑幾時
偶向悅亭杉外立
元來傳在最高枝

八桂蒼蒼湘水南
師鄉我客飽曾諳
五年不見今年見
猶得寒爐一夜談

過洞庭風作

洞庭波面忽如雷
萬斛樓船舞一桮
為報馮夷莫相嚇

儘曾經着暴風來

次韻答八十三外翁見招

乃翁心事別辟月到寒塘歌枕三竿日橫經一炷香尚
思同燕塵還欲對胡床行矣拏舟去金鐘亦自將

招俞清老并簡康遠禪師

腰錢騎鶴上揚州妄想空來事事休惟有三竿風月在
待君同理釣魚舟

欲知何處是生緣問取維摩室內天渠若口鉗無答語

竹西堅卧許安全

石塔迢迢兩閨餘
潛知骨瘦奪松枯
煩君為把公憑判
同過江來伴老夫

詩送晦叔先生

先生帶花六十年
青春不老花長妍
金盃停手便索去
一片閒雲飛上天

知是初平幾代孫
雙携日月弄乾坤
人間有眼誰窺得
笑出常州西郭門

疾卧幾為萬鬼隣金丹一粒遇高真此身從此無他事
長作昇平擊壤人

一別相逢幾時東西南北酒盈卮天機深遠猶須決
莫便飛騰不我期

萬里來歸荷聖恩焚香趺坐欲無言羣仙若問誰堪度
為說真心到本元

寄和庵主

自從衡嶽得高風南北東西久未逢惟有旃檀知此意

為傳消息到中峯

簡俞子恭

東郭名園步可過
病餘猶以路為多
何當畧約通新徑
日日從君擊壤歌

戲簡錢濟明

雨雪相仍勢未休
禦寒惟酒勝重裘
誰知旱久猶乾涸
不見玉泉東向流

又

載酒無如君最頻年來緣底斷音塵只應咫尺譙門住
也學兵厨不送人

就舜諧覓石

數峯寂寂卧蒼苔醉眼何曾略為開乞與茅簷淡相對
要令雲雨出山來

智岸將往錢塘索妙樂庵詩勉此為句

向來楊處士今作岸禪師懶散元非我熙怡竟有誰長
應心似水不復口如碑此處真安穩何人妙得知

呈明遠

爾來無酒可沾唇只恐傍人恠獨醒
自笑金龜已當了
惠然誰復遣銀瓶

樞姪以詩來次韻示之

酷愛日長螢可聚幾人如古惜分陰
胸中萬頃清涼地
莫遣俗塵乘間侵

讀書

誰能也學讀書痴園圃三年忘了
窺却恐主人如世柳

謾攜藜杖去何之

挽詞

崇仁縣君魏氏挽詞

出自高明盛歸從望族賢崇仁膺帝命積善信家傳
翌纔三世冥冥忽九泉空餘可銘事追繼采繁篇

獵獵霜郊路銘旌捲朔風堂前萱尚北門外水猶東
貌入丹青冷恩留祭享豐鄉人仰閨範方看子孫隆

故通直強君挽詞

白髮將年往青衫甫宦遊從來四方志曾未一分酬幕
府殘機畫問門失好修惟餘舊秦月寂寂照新丘

金丹猶在鼎馬鬣已成封夢斷飛雲鶴春歸遶墓松韋
編元自若藜杖竟誰從賴有承家子流光得所鍾

龍圖胡公挽詞

華屋初成後安車未用時誰知五朝舊俄與九原期德
映文恭顯名叅修簡垂淒涼獨心事無復盡施為

正爾逢千載何為不百年龍圖虛舊閣馬鬣啟新阡方

寸留天鑒清規入世傳
韋平向來盛端屬子孫
賢知已如公少還鄉
特地親分攜能幾日
聞語歎驚人永念恩
常在深慙報未伸
從橫淚交下空灑朔風頻

胡公郡君李氏挽詞

先別人間去由來天意微
初心在偕老此日遽同歸
鏡掩孤鸞舞津藏雙劍飛
空存錦囊誥依舊照霞衣
正是家肥日香奩曉不開
侍兒猶扇枕良藥已停盃
蘋老殘初薦萱閒冷舊裁
只應有餘慶從此亘雲來

故通仕孫公挽詞

少微星忽墜疇昔夢初圓鄉社崇新祭書帷掩舊編亭
依金斗固兒戲彩衣偏踵續誰為傳吁嗟高士賢

君子不可見先生無復遭凶傳俄一旦吉養謾三刀德
與諸郎遠門將駟馬高傷心獨南陌松檜朔風號

故成紀李季侔挽詞

命也端難詰時乎竟莫來門庭方白晝冠帶掩黃埃萬
卷虛料理千金廢剝裁傳承子將顯猶得慰泉臺

師門深往好姻黨厚新情正爾追談笑那知隔死生松
風傳挽鐸壟月照銘旌莫預東郊送悲涼空此誠

故文安郡君劉氏挽詞

驚峯成記別聊現大家身瞬目超塵劫隨方得本真忘
憂殘舊草供祭冷初蘋獨有閨門淚潛然冬復春
願力堅如母脩然亦坐忘羞蘭虛孝養偕老誤榮光淨
域端何許遺經只自香它年盛追贈猶得賁餘芳

故承議季公挽詞

卓犖豪英內如公迥不羣
胸中妙莊老筆下藹機雲
勲業知誰覩聲名只自聞
空餘柏莊柏彌望拱高墳
甫畢榮親願歸休不計年
心冥塵竟遠善積子皆賢
萬事殘初夢千齡掩逝川
登門獨無路追感倍悽然

亡友皇甫民望挽詞

八行宜高選胡為不享年
鄉閭推往躅几席積子賜遺切

編俛仰成千古淒涼到九原
須知天報在有子共稱賢
超然遺象數非古亦非今
過我每終日惟君同此心
絕

編猶可續折角竟難尋已矣無由作高山空自琴

閻求仁太博挽詞

東國論交處于今馬鬣歸江山愁欲變冠劍歛成非事
業知誰覩聲名只自飛蒼蒼不容問落日掩晴暉

踵門寒日後留語竟黃昏能得幾日別遽為千古魂根
塵元自了生死更何言獨有人間淚隨風落九原

強評事挽詞

池亭春未改宰木已鳴風夙負三吳望今隣萬鬼中潛

光雖不耀遺澤定難窮
它日高門淚猶知駟馬通
不為明世得已矣舊山川
青眼誰樽俎黃金自簡編
鄉閭今昔異門戶子孫賢
我獨從君晚追惟更慘然

閭丘大夫挽詞

駕鸞紛集日松檜掩新塋
持節空諸路分符謾列城
閩山餘舊峻淮水漾前清
地下雖難作功名凜似生
營邱何處是不復問歸期
世事三吳冷風霜八月悲
生平雖爵祿身後只書詩
恩報嗟無及初心折涕洟

道鄉集卷十四

欽定四庫全書

道鄉集卷十五

宋 鄒浩 撰

制

吏部尚書除節度使制

係試中書舍人

四方在御資文武以成功八柄是嚴必勲勞而懋賞眷
此築壇之拜實居分閭之雄厥有真賢來膺異數用訓
剛日敷告治廷具官某學貫古今氣全剛大洞萬微於
忽眇挺一節於初終是為君子之儒出偶聖人之作踐

揚中外綿歷歲時逮入長於天官益推隆於人望審乎
甄拔既比迹於山濤肅以公方更同風於毛玠是用疇
其底績寵以陟明授茲六蠹之儀董我三軍之政於戲
黷武無烈雖盛德之不為忘戰必危亦前修之深戒朕
方躋民於富壽爾其體國而經營庶幾夷夏之安永紹
祖宗之盛服我休命勉圖膚公

中書舍人除翰林學士制

學士視草禁中雖以翰墨為選然論思獻納密贊事幾

其所以副予簡求者益在文章之外矣號為內相自昔以然久難其人今以命汝具官某志修而行篤學博而才高自昭于時無所比附夙稽羣議進直掖垣作為深厚之詞鼓助中和之化玉堂虛位莫爾宜居斷自朕心亟此褒擢夫自唐以來居是職者多矣淑慝具在可按而知其以汝自信于心而既効于事者鑒前人而擴焉朕不汝忘尚有異寵

戒百官修職業勿事朋比詔

係試中書舍人

朕自臨御以來夙興夜寐思所以遵奉先烈而成天下之務者無競於得人故訓迪厥官布列中外且冀人皆正直有如文王之時績用咸熙無愧舜帝之盛然而求之在位考之輿言其奉公守義者不加多隳職朋姦者不加少以方前古朕甚惡焉豈朕戒之用休者未盡其道歟董之用威者未盡其法歟抑士大夫狃於前日之習覲然安之未易遽革邪經不云乎示之以好惡而民知禁夫好惡者人主心術之動也既以曉然示天下矣

民且知禁而況士大夫乎繼自今往其各務正乃心飭
乃職上以成政事下以成風俗副朕所以期汝之意高
爵厚祿朕亦有以待汝而不遺也否有常刑朕曷敢赦
鄭紳可東頭供奉官依舊閣門祗候制

勅具官某朕臨御以來未嘗私爵祿以為恩而祥發宮
闈襲子慶事推隆異數厥有舊章躡進五官併為爾寵
爾其飭已務稱毋使清議得以疵焉則朕惟汝嘉

陳彥誠父繹特贈右正議大夫制

勅朕纘隆聖緒澤沛萬方凡厥幽明率從褒陟具官某
故父具官某早以才學蔚為豪英中外踐更譽問休洽
當熙寧有為之日受神考特達之知揚于禁林致位華
顯奄其淪逝積有歲年惟善慶之所鍾服義方而是似
式膺賁典越進文階雖冥漠之游聞難窮於視聽而寵
靈之異宜不昧於欽承享我恩榮用光泉壤

蕃官巴令渴等轉官制

勅具官某等爾以忠勇奮然身先冒敵摧鋒達于朕聽

第功應賞寵進爾官勉對恩榮益圖報効

蕃官已厚轉官制

勅具官爾以忠勇所至身先折馘摧鋒數有成績懋推
恩典寵進六官仍徇爾求就遷巡警益圖來効以對休
光

蕃官侯師正轉官制

勅具官某爾奮身行陣折馘以聞應予賞科用進爾秩
尚思報稱以廣後功

孟勝轉三班借職制

勅具官某爾父以忠濟勇數有戰功回厥寵遷用陞爾
秩勉從訓令相與致身尚有官榮待爾自効

朱紱除給事中制

勅給事中以封駁為職而一時之政令係焉必惟其人
乃克勝任具官某儒學吏治夙昭于時翊朕初潛灼見
忠實亟從諫省進陟東臺斷自朕心不以為速語不云
乎故舊不遺則民不偷然朕之所以用汝者豈直以故

舊而已哉勉修厥官以永終譽

張來除祕書少監制

勅具官某朕方從冊府以集天下之豪英嚴史官以昭
先帝之功德惟時寄選不輕用人以爾學博文高表于
多士召從孤外亦既踰年蔚然禮樂之中休有服勤之
譽總司祕籍叅預信書疇爾居焉朕命惟允勉圖報効
勿愧恩榮

張來直龍圖閣知揚州制

勅具官某揚於東南為一都會師帥其上率多顯人以爾文學著聲蚤踐臺閣寵還舊職徃莅兵民其思所以鎮撫之稱朕惠澤元元之意

鄧洵武轉官制

勅具官某朕惟神宗皇帝妙與道會肆筆成書集以寶藏就委史局爾於致力最為有年寵進一官用旌勤勩仰惟宸章在上燦若日星垂照萬世而爾獨以編次遷焉爾亦預有無窮之榮

入內都押梁從政降官制

勅宮闈左右之臣朕所親信事于廟社義曷可容具官
某受國厚恩弗圖忠報方哲宗升遐之始皇太后深念
大計召爾詢焉爾乃佐佑章惇請聽其語向非聖慮先
定牢不可移則惇之所以異意者將因爾而售也惇既
竄于海上爾猶處于禁中公議聿騰罪在不赦尚念神
考龍飛之日爾為攀附之人特屈刑章姑從輕比降官
褫職出領祠官服我殊休往其惕厲

王中正追復遙郡防禦使制

勅朕既嗣位與天下更始不間存歿咸以恩加具官某蚤奮邊陲晚罹廢黜奄其淪謝倏有歲年用伸孝子之情追復遙防之舊營魂不昧服我休光

任伯雨除度支員外郎制

勅具官某自諫路而遷省曹元豐以來具有成比以爾進繇朕選修職不回支度虛員往司其事夫財用多寡之數物產豐約之宜爾蓋論之詳矣且將於爾所行而

攷焉其勉之母怠

宗室仲奚所生母王氏等封郡縣太君制

勅天寧啟節慶肇宗親昭厥母儀推隆異數具官某所
生母某氏休有內德克成子賢既疏大邑之封申錫有
邦之號永綏孝養以對命書

宗室士瞻所生母郭氏封縣太君制

勅具官某所生母某氏等天寧啟節慶肇宗親有子而
賢義當同貴用疏封於湯沐以表異乎情文永對寵休

益循母道

王厚責授賀州別駕制

勅具官某朕惟祖宗以來仁覆天下固無此疆爾界之別間或興師問罪亦以義濟仁而已非造兵而嗜殺也爾以選拔為將曾不是思而乃深入青唐肆蹂族部私其寶貨禍及無辜怨結人心動傷和氣按章來上深駭予衷倘不明正典刑何以厭塞公議黜居散秩竄隸遠邦尚體寬恩勿忘循省

郭寔除文思副使制

勅具官某集禁旅以嚴武備詔令之所謹也爾能飭力
遵奉迄用有聞寵進厥官尚思來効

李昭玘除太常少卿制

勅具官某太常禮樂之司所寘以為屬者猶皆一時之
選而況典貳寺事詎可非其人乎以爾博通古今久踐
臺閣攷于已試蔚有休聲惟時亞卿莫汝宜處若夫妙
盡情文之本深明損益之宜使朝廷典章與三代同風

爾在都司固已稔聞而熟察矣勉對朕命以崇厥功

陳察除左司郎中制

勅具官某尚書總六官之政令而左右司分贊綱轄其
選甚重以爾言斯可復行不苟難中外荐更聲著臺閣
越從文部擢實都司其以爾自廸于中庸者擴而克之
以上承而下肅則豈惟有助予治爾亦無愧於所學

蕃官結攢抹等轉官制

勅具官某等爾忠不容叛力推賊鋒折馘執俘各以功

顯第數來上隨進厥官服我恩榮尚思後効

龔原除集賢殿修撰知揚州制

勅具官某師帥大邦為時重寄朕所畀付屬在老成以爾拔自儒宗荐更省闈分符共治民吏宜之寵陞書殿之華就總列城之重朕於天下固已一視而同仁矣爾勿以外自輕思所以利吾元元者以需報政不亦善乎

王說除直龍圖閣知青州制

勅師帥大邦為時重寄朕所畀付屬在老成具官某歷

仕五朝服勤諸路剖符持節民吏宜之寵陞內閣之華
易總列城之重朕於天下固已一視而同仁矣爾勿以
外自輕思所以利吾元元者以需報政不亦善乎

陳次升除右諫議大夫制

勅朕方無所忌諱以延天下之忠直而職總獻納尤思
得人與其取之於方來孰若用之於已試具官某以御
史事神考以補闕侍泰陵知無不言簡在朕聽召居橫
榻亦既踰年曾弗撓於夙心實有裨於初政用疇爾最

長我諫垣然自元豐正名以來臺諫之職既已有所分矣爾其勿亟勿苛思所以稱其職者而勉焉以副朕獨斷用爾之意

內侍省押班閤安轉團使制

勅朕內屏玩好之具外斥土木之功嘉與萬邦同臻康靖至於寅奉列聖則苟可以致隆者未嘗不勉焉所以伸孝敬也助成此志豈不宜褒具官某久侍宮闈備陳忠力嚴晬容而增飾罄夙夜以施勞肆遷團結之榮寵

異班聯之寄往帥而屬共廸官常以承朕奉先無所作
為之意

盧世延陞通事舍人制

勅具官某爾叅聯上閣久已十年率職無違在所甄錄
特陞通替前奉軒墀稱我恩光勿忘報効

張守誠妻趙氏封郡主制

勅某縣主某氏朕惟哲宗皇帝宗祀明堂大推慶澤肇
從宮禁與國同休而克儀張氏願以所蒙進爾郡號益

堅自誓之節永對非常之恩

內人劉氏等並封國夫人制

勅具官某氏等朕纘隆聖緒二年于茲矣苟有功于國者雖邈然孤外之人猶且褒陟再三而況宮闈之內乎以爾護視朕躬既久不懈疏榮顯郡未稱勤勞用進錫於國封以寵光乎禁掖欽承休命永保壽康

內人張氏等並封郡夫人制

勅具官某氏等朕纘隆聖緒二年于茲矣苟有功於國

者雖邈然孤外之人猶且褒陟再三而況宮闈之內乎以爾佐佑朕躬服勤夙夜疏恩錫號亦既彌年用增錫於郡封以寵光乎禁掖惟時休命勿替欽承

內人薛氏等並封典字制

勅具官某氏等朕於掖廷之內雖未嘗以名器假人而久於服勞者亦必有以報焉以爾列職交修協纘衆務不改司存之舊就遷品秩之榮尚勵夙宵以圖來効

後苑土地封顯應侯制

勅後苑土地爾神分職幽間實在禁籞數有顯應動乎
見聞宜昭正直之功用錫列侯之號享予秩祀與國無
窮

劉鑑轉官制

勅具官某爾父有方辭榮禁省就佚靈宮寵其舊勞推
以異數願回所授併陟爾官移孝為忠勿忘圖報

蕃官王母羅等轉官制

勅具官某等爾深入賊境遇敵而前折馘執俘各以勇

濟進官一等用酬爾功尚有戰多勿忘忠奮

許宗孟父元贈右正議大夫制

朕纘隆聖緒澤沛萬方凡厥幽明率從褒陟具官某居
以孝顯仕以才稱久幹邦財被遇仁祖爰自周行之內
越陞侍從之班有子而忠能世其美式膺責典追進文
階宜不昧於欽承庶永光於泉壤

富紹庭除祠部郎官制

惟爾先正相予祖宗道德勲勞竦服夷夏其宰土之木

拱矣故笏可見猶當異之以比甘棠而況遺範之所在乎以爾少長義方習以成性擢于久仕總領常平而乃力自貢其誠心冀不違於先志奏封來上朕用汝嘉詩不云乎維其有之是以似之朕亦何愛典祠之清選而不汝鵬焉以勸夫孝衰於親者往其欽哉尚有褒寵

王謹等轉官制

勅具官某等朕所服御以見天地宗廟之物爾能總視制作克應禮文各進一官用旌勤勩尚思來効以稱恩

光

盛次仲直龍圖閣知鄧州制

勅具官某南陽遣帥屢矣而莫安厥居無以綏靖一方
朕甚念之以爾性質寬和詞學敏瞻奮繇臺省歷試事
功一紀于茲迄無罪悔必能識朕所以子育元元之意
進直內閣寵賁爾行勉繼前人作民父母

宗室仲馬贈節度觀察留後追封郡公制

勅五屬之間朕所惇叙以為天下先者也既有以榮其

生必有以哀其終名位不同禮亦異數具官某以信厚之質習義理之文雖居富貴之中不愧祖宗之訓奄其淪逝深用惻傷惟兩使留務之雄惟五等爵名之竣未嘗虛授併以為恩魂而有知服我休命

曹孥妹婿劉復特與三班奉職制

勅某朕以曹孥乃賢懿大長公主之子仁宗皇帝之外孫也憫其不壽特推異恩而孥父詩以爾為請勉自修飭毋愧官榮

宗室世福新婦張氏等叙封制

勅具官某氏等天寧啓節慶肇宗親惟時閭儀稱其夫
秩用䟽封於善郡以表異乎情文永對休光益循婦道

王舜臣等特與轉官制

勅具官某等嫌疑之間今昔所慎爾父愍既以爾自隨
矣又上爾功應賞豈其心果足以取信于人乎朕方推
至公以待天下終不以此廢爾戰多各進一官勿忘圖
報

醫官仇洵等轉官制

勅具官某等爾以方藥祗事禁廷有勞可嘉用陞秩序
愈其精慎稱我思榮

道鄉集卷十五

欽定四庫全書

道鄉集卷十六

宋 鄒浩 撰

制

呂抃父夏卿贈右光祿大夫制

勅朕紹隆聖緒澤沛萬方凡厥幽明率從褒陟具官某
早以博學望于先朝嘗預纂於信書遂典司於誥命忽
其淪逝多歷歲年儼風節以如存矧教忠而有後式膺
賁典越進文階永為泉壤之光服我寵靈之異

王震特追復朝請郎制

勅朕嗣位以來需澤數下信有罪戾猶與自新而況左
右侍從嘗為大臣之所釋憾者乎事當昭明不間存歿
故具官某被遇先帝擢司刑獄偶鞠治之弗阿罹中傷
之深詆斥居遐外奄至淪亡惟孝子力訴其沉寃惟憲
府按見其無過用還初秩以闡大公九原有知服我新
命

美人錢氏追贈婕妤制

勅朕纘服以來漏泉之澤覃及方外而況宮闈左右嘗
為神考之所禮遇者乎追加賁贈顧曷可已具官某氏
蚤以柔順應于選求助成坤載之儀光映史書之美奄
至大故久已歷年進聯嬪御之崇庸示惻傷之意惟茲
異數實視上卿冥漠有知聿其欽享

呂希哲除光祿少卿制

勅具官某寺監之貳均為盛選易地而處厥有故常爾
既致道潛心以世其所當然者矣視吾酒醴膳羞之事

猶祕書圖籍也則何適而不為忠乎勉帥官僚往共厥服

醫官任仲言轉官制

勅具官某元子之慶天下同之推恩后家時乃盛典遷以及汝預有光榮勿替初勤益圖祇事

李昌本補三班借職制

勅具官某朕惟風化之本肇于中宮故推異恩以賁其父其家所欲授者朕則審而從之爾既入官勿忘祇飭

劉忠轉皇城使制

勅具官某爾折馘之功應于賞典寵遷官秩遂極使名
尚勉之哉以稱恩遇

向糾轉左朝議大夫除司農卿等制

勅具官某等朕惟皇太后功存宗社與國無窮奄棄東
朝遽終大事所以致孝義者不可得矣推恩外氏其敢
後乎爾等乃慈德之諸父而中臺之高選也率職以事
上檢身以齊家攷於公言咸有令聞式昭異數用陟文

階或冠卿列於司農或正郎位於司計往其祗慎茂對
寵休

王震轉翰林書藝局直長克待詔制

勅具官某二帝三王遠矣而節用愛民畏天納諫所以
為子孫無窮計者莫如我祖宗最盛蓋其詳不可勝舉
而其要具于寶訓朕將齋戒以觀夙夜以思奉以修身
而治天下庶無愧乎畀付神器之意故委儒臣是正而
命爾書之爾亦不為無助寵進爾秩以示朕無勞而不

錄也

向子章等轉官制

勅具官某等朕惟皇太后功德甚大念無以報稱肆於爾等悉推異恩所以隆外家而昭孝思也爾受訓戒于東朝非一日矣奉以飭厲雖久不忘則有以慰在天之靈可不勉哉

李擴轉官制

勅具官某等朕推恩外氏以及其姻婭而寵遷階秩爾

等與馬勉思所以報稱朕命者勿使有愧於清議

向氏等並進封次國夫人制

勅具官某氏等朕推恩外家無遠弗及而況東朝同氣
慈愛素厚者乎進爾國封慰予哀念勉循婦道永對休
光

劉氏等並進封郡夫人制

勅某氏等朕惟東朝永棄孝養肆於外氏悉以恩嘉進
疏顯國之封用薦宜家之慶勉循閨範茂對休光

李濟補三班借職制

勅具官某男某爾父隕于行陣朕甚憫之錄爾以官是為忠報

董孝忠等轉官制

勅具官某等朕誕膺駿命續奉丕圖凡所君臨率皆恩及惟爾守邦之舊久推効節之勤宜有遷陞用昭寄遇益圖忠順對我寵光

楊永慶等降官制

勅具官某等朕方推信義以撫羗人爾職在奉承乃庇容馬盜降秩一等尚為寬恩

內人王氏授仙韶使制

勅具位某朕方宅憂無所用樂汝既久於其職當遷矣朕亦安得而止哉然九重之外不可戶曉宜識此意務遠嫌疑庶朕慎獨之心賴以信乎天下

內人張氏追贈儀國夫人制

勅具官某氏朕於一時攀附之人生既加厚歿亦如之

所以隆褒賁之恩全終始之意惟爾淑慎祇事有年奄忽云亡動我心惻自郡而國追以為榮尚其營魂識此命數

蕃官乞商等轉官制

勅具官某等朕於有功未嘗不報而況邊陲用命克摧賊鋒視等遷官曷可爾後惟忠惟慎尚勉之哉

內侍鄭居簡等宮觀制

勅具官某等爾祇事宮闈之日久矣而遽以外請宜在

聽從解劇就閒越進爾秩思所以稱勉為後圖

高俅轉官制

亟遷秩序密奉軒墀蓋朝廷盛選也而朕不虛授惟爾
試藝應格逢時致身故以是命焉其思所以稱朕命者
勿怠

陳瓘除右司制

勅具官某文昌萬務之所總也為郎列曹猶選時望欲
助綱轄可非其人爾道學淵微氣宇完固謀猷効于已

試中外稟以承風擢寘都司朕命惟允夫爾嘗為耳目之官矣朕所聽用多爾入告其以是反求諸已則見之行事豈不休哉

歐陽棐除左司郎中制

勅具官某爾名臣之子能世其家以顯聞于時為清議所屬荐歷省部越一紀矣而都司高選雅望肆以命爾其以爾嘗試而既効久畜而未施者肅贊綱紀以稱朕立政立事之意

張恕除工部員外郎制

勅具官某名臣之子以才自奮贊治天府亦既逾年朕嘗聽其言而攷其效蓋信乎可以赴功也冬官選屬肆以命爾其以爾夙承於義方者往佐而長以謹吾百工之事

郭天信轉官制

勅具官某卜筮先聖之所不廢也而朕亦用之有嘉汝言已日多効遷官一等益務究心

內人王氏封郡夫人制

勅具官某氏爾總帥官屬以修禮儀起居之事蓋已久矣有勞可錄寵錫郡封勉對恩榮勿忘祇慎

內人張氏封典字制

勅具官某氏自掌封典其品異矣凡厥廩賜視以為等以爾服勤張設之久故以是遷焉勉稱朕恩勿忘祇恪

內人任氏等並封掌字制

勅某氏等官官由掌字而上始預品秩蓋未嘗輕授也

以爾實自潜邸侍朕續圖凡一時遭遇之人既已在所
陟矣可不以是為爾榮哉勉稱異恩勿忘祇恪

李潜等並落致仕制

朕欲士大夫風節奮厲以成一世之俗而忘已徇物或
者安之與其嚴法以示懲曷若表賢而自勸以爾身為
禮義行貫幽明歸卧鄉閭世所推尚精神思慮雖老不
衰近臣以聞適協朕意傳不云乎可以處而處可以仕
而仕孔子也爾既師之以治已有日矣勉承朕命以暢

遠猷

內張根云以爾孝能尊祖心不近名謝事而歸年甫及壯身潛道顯譽問甚休在列以聞適協朕意

苗履轉官制

勅朕方戢兵與天下休息而運籌制勝坐以無事則惟將帥之良是賴具官某忠勇智略克紹家聲擢護塞垣能體朕意適茲員闕就陟軍階其茂對於寵休以助成於綏靖

皮場土地封靈貺侯制

勅皮場土地神人之分異矣傳稱以道莅天下則其効

至於神不傷人爾神非特不傷人而已瘍醫之所難療者又能愈之以顯濟於一方朕咸秩無文肆及遐外而況都邑之內靈貺若此者乎爰視侯封褒錫美號益隆初惠以助吾仁

岑象求除寶文閣待制知鄆州制

勅侍從之臣入居省闈以協贊庶務出臨藩翰以宣導德澤朝廷禮遇其體惟均具官某蚤以推揚事朕潛邸比之流輩莫汝為先而學篤行完朕自擢識汶陽擇帥

內閣陞華其往鎮於一方以少休於勤勩愈其思稱勿替厥心

胡田特復文思使制

勅具官某爾降官以來數更需澤引朞叙復法有故常其還正於使名以示除於往咎勉圖報効益厲忠勤

陳祐差通判滁州制

勅具官某朕得汝於部使者列薦之中斷然用之以廣視聽蓋將期年於此矣宜自信所守既久益堅而乃觀

望以言意在推引豈不失朕用汝之本旨乎其罷諫垣往叅郡事勿忘省察以為後圖

郭知章授權刑部尚書制

勅朕以仁心仁政覆育天下間不得已至於用刑則與其殺不辜寧失不經奉承而行屬在司寇為之長者可輕授哉具官某被遇泰陵亟隲法從逮予纘服嘗貳秋卿有績有言載于公議是用召從帥府越總刑章惟汝進擢以來更歷多矣自以為無所向背以致其身其以

是率屬而修職焉方能副朕欽恤之意

周鼎權刑部侍郎制

勅朕以仁心仁政覆育天下間不得已至於用刑則與其殺不辜寧失不經奉承而行屬在司寇為之貳者可輕授哉具官某進以刑官薦居法寺斷獄弊訟勢莫可移隱德陰功久乃自見攷于僉議擢亞秋卿其以汝夙信于中而既効于外者贊長率屬而修其職焉必能終始副朕欽恤之意

周彥質除戶部郎官制

勅具官某戶部總天下財賦力役之政令而郎中實分
職以任其事以爾出奉使指能裕吾民自江以西無復
愁嘆不負先帝臨遣之意故以是擢爾居焉且將究爾
之才其思所以興利除害者往佐而長以濟厥功

李詳轉官制

勅具官某爾率衆以摧賊勢為梁以濟援兵嘉爾有勞
應予懋賞越遷官秩亟預朝班其勉對於恩休益務圖

於報効

孔平仲除金部郎中制

勅具官某爾文學行義表于儒林召居地官方贊厥事
會課來上序正郎曹就易司珍勉圖來効

錢愐授如京副使制

勅具官某朕於燕國大長公主既盡所以崇奉之禮施
及其子亦異常科是用因時錫名介于使列以肇爾承
家之寵經不云乎不患無位患所以立爾知所以立則

位至矣可不勉哉

王越祖母沈氏封長壽縣太君制

勅某氏朕欲天下之為人子孫者莫不同我孝治篤於其親故眷求高年以風勸之爾壽甫期願式應褒格用顯閨門之慶寵䟽湯沐之風祇服異恩益綏遠福

胡舜臣補借職制

勅具官某朕於死事之孤尤所矜恤而有司言狀以爾名聞往續官職勿忘忠報

宗室仲顗贈開府儀同三司追封崇國公制

勅朕惇叙九族以訓迪天下故於其生也既有以篤其
恩則於其歿也亦有以異其禮具官某於朕為諸父於
朝為顯官而能務遠悔尤克循軌範居有刑家之美動
惟事上之勤曾不百年奄終一世冠爵名於五等視儀
物於三司用將痛悼之情以茂哀榮之數尚其不昧服
我殊恩

內侍李穆等轉官制

勅具官某等爾祇事東朝歷年浸久服勤不懈在所褒嘉屬祔享之既終遽引誠而祈外各從爾志勉對恩榮

內侍馮章轉官制

勅具官某爾介于使列之日久矣命既外徙還陟舊階惟用心不替於夙宵則修職豈殊於出入勉圖來効以稱厚恩

李延賁除刑部郎官制

勅具官某朕妙簡良士協贊秋卿而質厚才通汝為已

試必能副朕所以慎用刑者惟察惟法往既厥心

姚古轉官制

勅具官某引進於橫班中尤為高選非勤勞夙著歲月
滋深何由得之哉屬有虛員莫汝先者益圖報效以對
褒陞

任景先補官制

勅具官某汝名在戚畹之日久矣慶國始筭恩有異數
推以及汝進服官聯勉思報稱之宜勿廢恪恭之守


宗室令翬特贈朝請郎制

勅具官某朕於異姓之臣猶寵其生而賁其歿以全終始之恩以盡哀榮之意而況著在屬籍朕所兄先文以致身秩于朝路既奄終於一世用超陟於三官尚其有知服此追命

李昭玘等降官制

勅具官某等朕惟虞主之設所以迎奉欽聖憲肅皇太后之神以嚴祭享而致孝思者也爾等既聯厥事乃忘

敬恭授受之時曾弗省察閱實來上爾罪甚明先後輕重隨以降秩往其惕勵服我寬恩



道鄉集卷十六

欽定四庫全書

集部

道鄉集卷十七至十九

詳校官庶吉士臣吳烜

侍讀臣孫球覆勘

總校官中書臣朱鈐

校對官典簿臣劉景岳

謄錄監生臣費元震

欽定四庫全書

道鄉集卷十七

宋 鄒浩 撰

制

安燾除觀文殿學士知河南府制

入冠樞廷之重出司留鑰之嚴朕所褒優罔間內外具
官謀以深忠直道受知于裕陵以厚德豐功被遇于哲
廟周旋二府儀表四方逮于躬政之初起自復常之後
還居宥密正賴謀謨而乃亟上封章力陳病瘁旣惻誠

之莫奪在勞逸以宜均加秘殿之隆名進文階之峻秩
往臨舊治式便爾私書不云乎雖爾身在外乃心罔不
在王室尚體茲意勿忘告猷

朱被除集賢殿脩撰知壽州制

朕眷遇藩邸之臣厚矣思有以處之使不失其宜則雖
分符出守猶侍朕左右也具官某頃由諫省擢寘瑣闥
雅志在民久而不易俾遷書殿之職往臨淮右之邦勉
希寬條以期善最

謝文瓘除給事中制

封駁之職疑若與朝廷異趣然命令果有未安苟或以此為嫌則人材黜升政事廢舉將有失其當者矣為害可勝計哉推擇用之尤當致慎具官某頃由時望擢實從班有猷有為弗激弗撓其輟掖垣之次往居瑣闥之嚴勉罄夙心益收來効

王渙之除起居舍人制

具官某左右史朝廷高選也非文學行義著于一時惡

能直筆以紀言動之實哉爾簡在朕心為日久矣虛員
擇士僉以為宜尚有褒嘉待爾稱職

朱彥除左司郎官制

具官某爾學窮道義行應楷模越自天官擢司教職休
有士譽達予聽聞惟時都司高選雅望疇爾善最亟此
褒陞往罄猷為協贊綱轄

王博聞直龍圖閣知延安府制

具官某安邊在於擇帥而彰武重鎮尤難其人以爾出

總漕權入居卿寺才優智敏無適不宜必能宣國威靈
以釋西顧之慮進直內閣寵賁爾行勉稱異恩徃其飭
勵

秦玠等敘復官制

具官某等爾雖在責籍而以醫召用服勞夙夜亦既逾
時隨厥輕重敘復官秩益精方技圖報異恩

蔣之奇知樞密院制

內握萬兵之本外制四夷之命朕所倚賴尤在老成既

得其人就加褒陟具官某頃由登用入贊謀謨以夫高世之才行乃康時之志惟助成於綏靖曾不動於聲容閱歲于茲厥功甚茂其峻遷於位序俾專總於樞衡斷自朕心實諧公議若夫長慮卻顧偃革息民以承宗社無疆之休則爾既熟其所當為者矣慎終如始詎假訓言

陸佃除尚書右丞制

二三執政之臣朕所委聽以圖機務者也休戚所係夷

夏同之苟非其人曷敢輕用具官某蚤緣道學被遇神
宗擢寘從班休有善譽雖數更於事變每自信其誠心
逮予纘服之初入冠列卿之重而能銓衡弗紊獻納居
多眷惟右轄之求式敷登庸之意仍遷峻秩併示殊恩
噫朕方建用皇極而世或執偏以自是朕方懋昭大德
而世或懷利以相傾推原厥由宜必有在爾旣見而知
之矣勉思同寅協恭救此之弊庶幾使衆賢和於朝則
萬物和於野不得專美於前載

章宗同知樞密院制

朕惟天下治安之本實在二府故文武雖若異任而眷注未嘗不均必求其人以贊樞極具官某受知哲廟擢付帥權旣生致於酋豪且廣恢於境土屢形捷奏數被褒嘉眷宥密之湏才越班聯而登用蔽自朕志寵示殊恩惟不忍肝腦之塗郊原故能愛重人命惟備見飛輓之耗帑廩故能慎惜邦財事在變通爾知之矣勉思所以善其後者以副朕躋民仁壽之意

錢穀除度支郎官制

具官某朕方集才智敏強之士分任劇曹共熙庶功而司度虛員擢爾于外以爾出使能稱吾指者入祇厥職則來効可圖其勉之哉

閻詢特贈金紫光祿大夫制

朕紹隆聖緒澤霈萬方凡厥幽明率從褒陟具官某夙由才望歷試事功既克著於猷為亦自全於出處有子而令能世厥忠適茲貢典之行越進文階之峻尚其冥

漠不昧欽承

任端等轉官制

京師諸夏之根本也而周城千雉轟然一新雖出於神考之睿謀其所以視版築愈疾癘交脩厥職弗懈夙宵則汝等與有勞焉朕不汝忘第進官秩益圖報効以稱殊恩

蕃官馬蒙卓轉官制

爾承襲厥職為部族所歸有司以聞良可嘉尚其率循

於舊比就擢寘於官聯服我恩榮益圖忠順

蕃官鐸撒四轉官制

邈川之役爾實有勞折馘摧鋒應予賞典俾隨級數進
陟官聯尚勵忠勤以圖來効

蕃官兀征蘭羶角補官制

爾父年高以爾為請矧惟忠勇久已彰明特優寘於官
聯仍就司於警捕勉承父志圖報殊恩

趙約等復官制

朕既嗣位與天下更始凡以罪廢蕩然一新而況自狀
厥情如爾懇切固宜在所恤也稍還舊秩進預班聯益
勵夙宵以圖來効

薛思齊除左侍禁制

元符皇后請以先朝慶誕之澤增進爾官朕命從之蓋
為異數勉思報効益務忠勤

在內城隍土地封昭貺侯制

朕惟百神受職於都邑之內猶百官之在朝廷各司其

事而不相亂苟有功於國則必有以報之亦無幽顯之異也爾主吾城隍為日久矣而能肅鎮方隅救寧中外既昭殊貺宜煥褒崇用比秩於上公仍寵增乎顯號尚祈顧享益致閔休

李氏等並贈縣太君制

朕即位之初推恩海內凡大夫有列於朝者俾獲伸其志以及其母而爾歸于望族協相顯人有子承家服在七品肆舉追榮之典用䟽大邑之封尚克欽承以光流

澤

王資深等並除監察御史制

天下之事總于六司朕既擇人而任之矣又妙選剛明
以為御史俾分察其不應法者而爾望實著在一時斷
自朕心擢寘茲位夫好名者多訐徇利者苟容此古今
之通患也爾能超然於二者之外則肅郡吏以熙庶績
必能助朕為民極之意朕亦待是而後陟以究爾之夙
志焉可不勉哉

楊文翰弟文真補三班奉職制

文翰旣歿推厥承襲而光爾等咸曰汝宜邊吏以聞在所褒錄往圖報効益勵忠勤

孫諤除國子祭酒制

朕惟神考以天縱之聖發明經術作新人才蓋自三代以還未嘗有如此其盛也肆朕臨御敢不奉承一時師儒選置雅望在於總率尤務得賢以爾博學多聞而守之以約忘言會道而動惟厥時爰歷試於事功播休聲

於臺閣舉酒而祭實長辟靡推擇所宜無易汝者夫神
考所以造士之本妙與天地同流雖不可得而窺若其
稽古驗今創為教法則汝昔在宰府固已槩乎有聞矣
用以師屬以迪士心俾所期于俊傑者愈久而愈光豈
不美哉

蔣之奇陸佃章綯贈曾祖制

內安百姓外撫四夷朕所賴乎輔臣者重矣是豈一時
之功哉夫賴其功者既不止於一時則榮其先者宜追

及於三世蓋不如是不足以為稱具官曾祖某躬行仁

義迹晦丘園佑啟後人總冠樞極

陸改總冠樞極云參預幾政章改躬行仁

義以下云飭躬行義困于小官佑啟後人協贊樞極

積德之報至此益彰雖已表

於儲宮尚未配其流澤從于一品就陟崇階服我命書

永光泉壤

陸佃章綯卽自雖已表以下改云文階二品之崇東宮三少之列用光流澤以茂寵靈

蔣之奇陸佃章綯贈曾祖母制

朕之所以待柄臣者隆名顯秩旣已藩飾其身矣苟於其先無以異之與凡卿大夫等則何以昭體貌而崇勸

獎乎追賁所加宜及累世具官曾祖母某氏躬有淑德
歸于令門惟積善以滋深故慶流而益遠執我大政實
爾曾孫用新列國之封光配官僚之峻

陸郡佃章案即
改云用新名郡

之封光配
官僚之貴

尚其冥漠不昧歆承

蔣之奇追贈祖制

為善之報不在其身必在其子孫蓋雖遲速不同其効
未有不如此者夫為善豈期於報哉天道固當然耳朕
率是意寵待臣鄰肆有追崇遠及王父具官祖某安子

隱約以德自豐源深流長至孫而顯總于宥密清議歸之越從宮傅之崇進陟公台之峻用昭爾祉以對天休

陸佃追贈祖制

才高學博望著英躔有志在時至孫而達入參機務與議歸之越從諫省之崇進秩儲宮之峻用昭爾祉以對天休

章綯追贈祖制

才高氣勁望著臺端有志在時至孫而達入陪宥密與

議歸之越從憲部之崇進秩儲官之峻用昭爾祉以對
天休

蔣之奇陸佃章綯追贈祖母制

篤於尊祖雖學士大夫之所同賁以殊恩乃執政大臣
之所獨禮惟其稱義則當然具官祖母某氏被服七章
兼全四行旣歸從於望族遂協濟於肥家積是休祥蔚
其孫子朕所登用賴以乂安載嘉流澤之光式茂追榮
之數進封顯國

陸佃章綯卽改
云啓封善郡

增煥私庭

蔣之奇陸佃章案追贈父制

自昔言孝有曰立身揚名以顯父母夫為人子者孰不有是心哉惟二三輔弼勲與位稱然後足以極其顯親

之榮具官服在下僚

陸云服在朝班章云介於使聯

陰自殖德命有所

制志不獲伸篤生賢英擢總樞極肆厥謀猷之助亟成夷夏之安推原所從褒錫敢後冠三公之峻秩正一品

之崇階

陸章云冠宮師之峻秩正一品之崇階

茲謂異恩徃告子弟

蔣之奇等追贈母制

曾參有言曰吾及親仕三釜而心樂後仕三千鍾不洎
吾心悲自古及今未有歷仕而心不再化者朕於一時
通籍之士既皆有以慰其心矣而況股肱近輔追顯其
親其可後乎某氏以正承夫以恩睦族祥發閨門之內
功形夷夏之中有子而然朕所眷賴自郡開國褒進爾
封陸章云小君錫號善郡啟封尚克承之以昌厥後

蔣之奇陸佃追贈妻制

朕既延登老成總冠樞極

陸云延登俊良翊贊機務章云翊贊樞極

其在閨

門之內宜昭伉儷之賢雖曰舊章實為異數某氏順承夫義協致家齊夙彰輔佐之功不愧圖書之訓惟時君子方厚倚畀用陟爾封以鴻厥慶往祇朕命益懋德聲

內侍閤守勲餘官李士京等轉官制

朕既踐祚思以天下之養奉承慈顏而仙馭莫留聞其遠矣惟是園寢密邇國南乃詔有司增廣制度爾能率

護衆職亟成厥功

李士京以下云率職祇事共成厥功

俾朕孝思有以自

慰眷言勤勩在所褒嘉寵進使名

李士京等改作一官

勿忘稱効

呂惠卿落職制

朕惟大中之道與夷夏為新宿負往愆多釋不問其或
附下罔上諠動一時義所當懲亦難并貸具官某頃緣
舊弼分任帥權方干戈未戢之秋正將士希恩之際循
名責實宜盡公心事君以忠矧存丕訓而乃肆形欺誕
敷奏罔功遂令獎勸之方悉入僥求之計開其後悔咸
以情言旣罪戾之甚明在典刑而奚逭姑從褫職特轉
寬科庶幾臣工自此知戒

石丕降官制

朝廷以爾為才擢預邊寄而乃不思審慎散失居多雖難追於典刑亦屢更於赦宥姑從降秩往務省循

田洪盈洪益加勲制

朕惟先皇帝祗率舊章聿成熙事斂時五福敷錫萬方爾以忠勤久居邊徼爰霑霑澤寵進勲名

洪益云屢霑霑澤併陟官

勲勿替厥心益圖來効

皇姪不器可右千牛衛將軍追封越國公制

惟我神考惇敘宗親凡厥本支率從典禮越王之後世
受爵封傳敘相承今實逮汝其峻遷於環衛以顯襲於
國公勉繼前人愈其祇飭

王存贈左銀青光祿大夫制

巖廊輔弼之舊朕所禮遇以勸導臣工者也旣以寵異
其生亦必追賁其歿所以極哀榮之數全終始之恩故
具官某望著英躔仕逢熙運迪中庸而制行躬仁厚以
持心更練百為堅完一操在元豐則受知乎神廟參聯

侍從之華在元祐則被遇于泰陵協贊機衡之重肆朕
纘承之際深惟故老之資邈在丘園蔚其風節奄觀遺
奏尤倍惻傷越陞二品之階峻視六卿之秩茲為茂典
用展眷懷尚克歆承以光隊路

才人鄭氏特進封美人制

天下之本在國國之本在家二帝三王以來未有家齊
而天下不治者也朕率是道以臨萬邦厥有褒陞必先
內德某氏祇事左右秉心肅恭動能畏於箴規居弗形

於私謁慶襲後宮之盛肇開玄乙之祥懿範聿昭淑聲
益茂宜遷美號以示隆恩惟克謹於初終乃永綏於福
祿愈其思稱助我化風

掌簿李氏知尚書內省公事制

朕不以名器假人蓋非獨外廷為然也惟時內省之務
方賴協濟之勤疇爾久勞肆加遷陟往其祇慎益勵夙
宵

韋定男晟補借職制

爾父服在邊陲隕于行陣憫其忠奮續以官榮宜思無忝之言往勵酬恩之志爾能自効尚有褒陞

蕃官趙景存等轉官制

爾祖以部族來歸爾父能世其忠順並膺寵祿多歷歲年惟慶襲於後人特榮加乎顯秩宜思繼紹力務恭勤尚有褒嘉待爾自効

孫志雄等補借職制

某等爾父隕于行陣朕甚憫之錄爾以官以為忠報往

其奮勵茂對恩靈

道鄉集卷十七